

05 November 2019

VERKLARING: NG Gemeente Kollegepark se reaksie op die Algemene Sinode se besluite rakende selfdegeslagverhoudinge.

Die kerkraad het met kommer kennis geneem van die besluite rakende selfdegeslagverhoudinge by die pas afgelope Algemene Sinode (AS) van 6 -11 Oktober 2019. Na afloop van 'n Kerkraadsvergadering gehou 05 November 2019 rakende hierdie saak, word die hieropvolgende verklaring voorgehou:

Op grond van die volgende besluit van die AS:

"Die AS erken die huwelik tussen een man en een vrou, maar besluite is ook geneem wat ruimte maak vir selfdegeslagverhoudings en -verbintenisse. Teenoorstaande Skrifbeskouing word geakkommodeer ter wille van eenheid in die NG Kerk. Kerkrade word aangemoedig om hul eie standpunte aangaande hierdie saak te formuleer om sodoende die diverse uitgangspunte te akkommodeer. Opdrag is deur die AS gegee om 'n huweliksformulier te ontwikkel vir die bevestiging van burgerlike verbintenisse tussen persone van dieselfde geslag."

In diepe afhanklikheid van die Here, wil ons ons hartseer en onsteltenis ten sterkste uitspreek oor hierdie besluite en wil as volg verklaar:

1. Die Woord van God staan sentraal in die uitleef van ons geloof. Primêr gaan dit oor die gesag en interpretasie van die Woord van God en die erkenning dat die Bybel deur God geïnspireer is. Die Woord van God, soos wat dit deur die eeue staan (Deut. 4:2, Matt 5:18 - 20) is die enigste riglyn vir die onderskeiding van die waarheid. Die Woord is 'n tweesnydende swaard wat skeiding bring tussen lig en duisternis, reg en verkeerd, heiligheid en sonde en beoordeel die bedoelings en gedagtes van die hart (Heb. 4:12). Hoe kan daar 'n vennootskap wees tussen reg en onreg? Hoe kan daar gemeenskap wees tussen lig en duisternis (2 Kor. 6:14). Die besluit van die AS kan nie aanvaar word nie, hier is nie sprake van verryking of verdieping nie maar 'n weg beweeg van die waarheid!

"Die sinode bely egter dat die eenheid van die kerk gefundeer is in 'n eenheid met Christus en die belydenisgrondslag, en dat hierdie eenheid nie verbrokkel wanneer daar oor Skrifhantering en Skrifuitleg ten opsigte van hierdie saak verskil word nie, maar verryk en verdiep word."

Ons sê weer hier is nie sprake van verryking of verdieping nie maar 'n weg beweeg van die waarheid! In die besluite aan ons voorgelê blyk dit dat hierdie besluite gebaseer is op iets anders as die Bybel alleen en dus 'n humanistiese inslag het. Is ons as 'n Christelike kerk verleë oor iemand wat van buite af wil voorskryf wat sy waardes en optredes behoort te wees, eerder as om Bybelse norme en waardes te wil aanvaar?

2. Christelike eenheid kan nie ten koste van die waarheid voorgehou word nie. Eenheid binne die kerk vind hom juis binne die waarheid van die Skrif en akkommodeer nie sondige praktyke nie (1 Kor 13:6).

3. Ons bevestig ons beleid aangaande die huwelik, nl. dat slegs die verbintenis van een man en een vrou as 'n huwelik beskou kan word (Gen 2:22-24). Uit die liefde in die huwelik soos deur God daar gestel vloei daar lewe voort, dws. 'n gesin - ons kan nie hierdie "liefde" wil verdraai nie. (Gen.1:28). Gevolglik sien ons nie ons weg oop om selfdegeslag verbintenisse te bevestig nie en sal dit daarom ook nie in die gemeente toelaat nie.

4. Alle leiers in die gemeente sal volgens Bybelse riglyne gekeur word, en wel op grond van hulle roeping, belydenis, spiritualiteit en die getuienis van hulle leer en lewe (1 Tim 3:1-9).

Ons is geskape na die beeld van God en daarom moet ons mekaar met respek en deernis behandel. Ons deure en harte is oop om mense in selfdegeslagverhoudings in die gemeente te ontvang en soos elke ander persoon te bedien met die evangelie van liefde in Christus Jesus.

Ons is bekommerd oor die stand van die NG Kerk denominasie. Die vrug van die Sinodebesluit is een van verwarring en onenigheid.

1. Die kerkraad versoek die Goudland Sinode om 'n dringende buitengewone vergadering van die Goudland Sinode byeen te roep waar hierdie saak op die agenda sal dien.


2. Die kerkraad vra die Sinode om op grond van **Artikel 37** dit ernstig te oorweeg om ons band met die Algemene Sinode los te maak sodat ons nie verder onder die AS se besluite staan nie.

3. Die kerkraad ondersteun nie die ontwikkeling van 'n formulier vir die bevestiging van burgerlike verbintenisse tussen persone van dieselfde geslag nie en versoek dat dit gestaak word.

As behoudende Christene wil ons vra dat ons hande sal vat en ons verantwoordelikheid opneem om uit te reik na alle mense met liefde, deernis en genade om Jesus Christus se verlossingsboodskap te verkondig. Mag God verheerlik word op hierdie herlewingspad. Mag ons in ons soeke na die waarheid die oog alleen op Jesus Christus ons Here vestig.



Dr. DP Senekal(Voorsitter)



Prop. Marnico Wessels (Skriba)